

NOVENA PREPARASAUN ATU SELEBRA SOLENIDADE S. JOSÉ HODI APRENDE NIA VIRTUDE RUMA

Loron dahuluk Novena nian: 10/03: Ita aprende S. José nia virtude **Silénsiu nian:** Bíblia mak Biblioteka boot ida. S. José figura boot ida iha istória Salvasaun nian. Maibé, tansá Bíblia la ko'alia buat barak kona-ba S. José? Bíblia la ko'alia barak kona-ba S. José. Kuitadu José... Se S. José la simu Anju nia mensajem iha mehi atu simu Maria nu'udar nia kaben saida mak sei mosu? Maromak nia planu nakonu ho mistériu maibé José iha silénsiu no fiar nia halo tuir de'it tan ida ne'e Maromak nia hakarak. S. José hanorin ita atitude fundamentál atu bele tama kle'an iha orasaun. Se ita kontinua hetan ataka barulho mundu ne'e nian, ita bele rona Maromak nia Nia Lia Fuan? Ita bele rona Espíritu Santu ne'ebé bisu-bisu mai ita? Mai ita aprende husi S. José ninia atitude silénsiu nian, silénsiu atu bele fó espasu no rona kle'an Maromak nia Lia Fuan sira. No prontu nafatin halo tuir Maromak nia hakarak mai ita.

Empeñu: Oinsá ha'u mantein atitude silénsiu iha ha'u nia orasaun sira?

Intensaun: Mai ita reza ba foin-sa'e sira atu kuda atitude silénsiu nian nune'e de'it bele rona no hili sira nia futuru tuir Maromak nia hakarak ba sira. Ami Aman

Loron daruak Novena nian 11/03: Ita aprende S. José nia atitude nu'udar ema justu/loos— S. José mak ema di'ak ida. Evanjellu S. Mateus hakerek katak José ema “justu” or “ema loos”. Nia mak “santu,” ema loos iha nia relasaun ho Maromak. Nia moris tomak kontinua iha uniaun ho Maromak. Atitude ida ne'e presiza aprende nafatin. Iha Novena ida ne'e ita husu ba S. José atu hanorin ita. Oinsá sai ema loos, ema di'ak, ema justu ida. Ekuilíbriu iha lia fuan no hahalok sira. Mundu kontente dada ema atu la ko'alia loos, atu bosok. Sai ema oin rua, iha oin ko'alia ida no kotuk halo seluk. Hahalok la tuir lia fuan sira. Jezús bolu ema sira moris hanesan ne'e laran makerek. S. José hanorin ita katak ema justu sira ne'e mak ema ne'ebé harohan, moris iha fiar, no buka di'ak iha situasaun loroloron nian.

Empeñu: Ha'u identifika-an nu'udar ema justu no loos? Iha eklibriu iha lia fuan no hahalok sira?

Intensaun: Ita reza ba na'i-ulun sira.

Loron datolu Novena nian 12/03: Fidelidade - Hanesan Abrão, aman fiar nia ba povu Israel ohin lora S. José mós sai aman fiar nian ba ita. Nia ezemplu hanorin ita atu imita tuir nia laran metin ho domin nian, ninia saran-an tomak ba Divina Providensia. Nia simu Maromak nia hakarak maski la klaru wainhira mensajem hatoo liu husi Anju. Wainhira Anju dehan keta tauk simu Maria nu'udar ó-nia kaben. Misteriu boot ida duni. Nia halo tuir didi'ak Anju nia mensajem tan nia fiar. Atu laran metin iha Maromak la dehan katak tenki hare buat hotu klaru tuir ita nia kriteria. No la dehan katak realiza ita nia knaar loroloron tuir ita nia planu. Laran metin iha Maromak katak, hamamuk ita nia-an, husik ita nia hakarak sira, tanba wainhira ema ida simu nia folin laek, pronto atu hamamuk-an tan Maromak mak ita bolu ema ne'e ema justu no sai fiel hanesan S. José. Ita husu S. José hanorin nia fidelidade mai ita, basa ita moris iha mundu ne'ebé nakonu ho ema la fiel ba kompromisu sira, la fiel ba knaar sira.

Empeñu: Oinsá ha'u fiek ba knaar sira ne'ebé ha'u simu?

Intensaun: Ita reza ba Relijiozu/a/a ne'ebé hetan krize iha sira nia vokasaun.

Loron dahaat 13/03: Ita aprende virtude obediénsia. S. José mak ema “justu” tanba nia halo tuir nafatin Maromak nia hakarak to'o rohan. Ita hare ninia protidaun/pronto atu hatan ba Anju nia lia menon sira

- Wainhira Maromak haruka Anju atu fó hatene ba nia, keta tauk simu Maria nu'udar ó-nia kaben lori nia ba ó-nia uma, tan nia kous dadaun ho kbiit Espíritu Santu. Nia hadeer husi mehi ba kedas simu Maria no lori nia ba nia uma. (Mt 1:20-24).
- Iha Jezús nia moris Anju mosu ba nia atu lori Jezús nó-nia Inan ba Egipto tan labarik nia moris iha perigu laran. Hela ne'ebá to'o ha'u fó hatene ba imi. Hadeer husi mehi nia lori Jezús ho Maria hahu halo viajem ba Egipto. (Mt 2:13-15)
- Iha Egipto Anju mosu husi mehi fó hatene katak atu fila ba Israel nia hadeer no lori kikuan hó-nia inan no hahu fali viajem ba Belem. (Mt 2:19-20)
- Iha mehi ida-idak Maromak husu ba S. José, atu halo buat ruma diferensia husi knaar loroloron nian. Hó-nia disponibilidade no laran metin ba Maromak nia halo tuir nafatin. La ho klarifikasaun ida. La iha diálogu ida no debate ida. Nia obedese ka halo tuir de'it.

Empeñu: Oinsá ita simu ita nia obediénsia sira? Ha'u simu obediénsia no hala'o ho kreatividade no responsabilidade? Aprende husi S. José atu simu obediénsia la ho lia fuan barak. Husi obediénsia ne'ebé simu ho fuan ho laran ita hetan mós grasa wain.

Intensaun: Ita reza ba relijioza/u no FMA ida-idak.

Loron dalimak 14/03: Ita aprende virtude ida tan importante husi S. José: **Kastu no domin.** Dala barak identifika nia ho simbolu ida "líriu". Líriu mak simbolu laran-moos nian. Pureza nian. Nia hatudu ninia domin hodi hadomi Maria no dedika-an tomak atu tau matan didi'ak ba Maria no Maromak nia oan Mane. Hodi halo knaar ida ne'e ho domin José realiza dadaun nia vokasaun. Bolu atu serví Maria no Jezús. Kastidade mak virtude ida ne'ebé tulun ema atu haluha nia-an no serví ema seluk. Kastidade husik ita hare buat ne'ebé di'ak no loos no furak. Hare Maromak iha ema seluk no serví Maromak iha seluk.

Empeñu: Iha responsabilidade sira ne'ebé ha'u hala'o, hala'o ho domin no hatudu katak ha'u ema sarani ka konsagrada ida?

Intensaun: Reza ba foin-sa'e feto ran sira.

Loron daneen 15/03: Ita aprende virtude ida tan importante husi S. José: **Umildade/Haraik-an.** S. José modelu haraik-an nian. Iha momentu hirak ne'ebé ita hare S. José nia haraik-an:

- ✓ Nia tenki akompañá no hanorin Jezús atu sai boot, ho haraik-an. Nia hatene katak nia eduka hela Maromak nia Oan. S. José konsiente katak labarik ida ne'e, la'os ema bai-bain ida. Nia Maromak nia oan. S. José tenki hakru'uk ba Nia. Maibé nia eduka no tau matan ba Maromak Oan ho respeitu boot. Nia la iha interesse ba nia-an rasik no atu realiza nia hakarak ruma. Nia tenki hanorin Jezús atu harohan, koñese lei no tradisaun sira. Nia akompañá Jezús ba iha Sinagoga atu tuir Ritu Judeu sira nian, iha loron Sábada. Nia eduka labarik oan atu tuir tradisaun Israel nian. Iha knaar hotu ne'e nia hala'o ho haraik-an. S. José serví Maromak ho maneira simples no haraik-an. Sai modelu haraik-an nian ba ita hotu.
- ✓ Jezús ho tinan 12 koñese didi'ak ona lei ne'ebé esiste katak matenek ona, katak sei kiik hela maibé sei obedese no halo tuir didi'ak Maria no José.

Empeñu: Oinsá ha'u moris pobreza iha tempu ida ne'e? Ha'u nia moris hatudu katak ha'u kiak?

Intensaun: Ita reza ba ema kbiit laek sira.

Loron dahituk 16/03: Ita aprende virtude ida tan importante husi S. José: **Servisu nain.**

S. José mak badaen ai ida. Ema bolu, *a construction worker, a builder*. Ema hotu hatene nia, dala ruma sira husu Jezús no dehan "ida ne'e la'ós badaen-ai nia oan? Konserteza katak S. José koñesidu nu'udar badaen-ai ida ne'e mak nia konpeténsia. Servisu nain hatene katak tenki produs buat ruma, arranja família nia presiza la prodús de'it aihan maibé hare katak família moris iha

ksolok no dame laran. Se família Nazaré mak di'ak liu ne'e dehan katak nia moris nakonu ho valores umanu nó-nia ema fiar nain ida. Jezús aprende husi S. José oinsá halo servisu. Alem de hanorin Jezús servisu bai-bain nian, S. José mós hanorin Jezús lei no kultura fatin ne'ebá nian. Ezemplu akompaña Jezús ba tau naran, lori ba apresenta iha uma kreda boot Jerusalém nian. Aman di'ak liu duni. Labele transmite ba oan buat ne'ebé nia la hatene. Nune'e nia eduka Jezús ho di'ak. S. João Paulo II ko'alia kona-ba S. José: José la hanorin de'it Jezús oinsá halo kadeira, meza no uma, maibé iha uma simples ida ne'e José hanorin Jezús oinsá tau hamutuk orasaun no servisu, ***ora et labora***.

Oinsá S. José servisu?

1. Nia servisu ho hakmatek, dame.
2. Nia servisu moderadu, sukat.
3. Nia servisu ho pasiénsia.

Ita hateke ba nia aprende husi nia atu servisu ho intensaun loos no la servisu ba ita nia-an maibé nafatin servisu no serví de'it Maromak hodi serví ita nia maluk sira ho di'ak. S. José la'os servisu no tau matan de'it ba Jezús no Maria. Nia tau matan liu-liu ba ita. Nia buka hare buat hotu ne'ebé ita presiza, tan ne'e se mak kuda devosaun ba nia, nia sei tau matan no haraik mós buat hotu ne'ebé ita presiza. Ema barak iha devosaun boot ba S. José, tau nia estatua iha nia meza leten dadersaan hadeer mai reza ba nia no dehan: S. José tulun ha'u atu hala'o ha'u nia servisu loron ne'e ho di'ak. Simples maibé akontense. Keta haluha nia matenek iha servisu no sei haraik buat hotu ita presiza.

Empeñu: Oinsá ha'u hala'o ha'u nia servisu loroloron nian. Ha'u servisu ho hakmatek, moderadu no pasiénsia?

Intensaun: Ita reza ba ita nia traballadór/a sira hotu.

Loron daualuk 17/03: Kontemplativu

Se ita hanoin ba Maria nia fuan mak fuan kontemplativu, hanesan iha Evanjellu dehan: “Maria fali rai hela liafuan hirak ne'e hotu, hodi hanoin di-di'ak iha nia laran. “ (Lk 2:19, 2:51) fasil liu atu hare katak José mós iha fuan kontemplativu. Ita la rona nia lian fuan ida. Katak nia ema kontemplativu no rai buat hotu iha nia laran. Iha buat barak ne'ebé ita bele aprende husi S. José ninia kontemplasaun: Servisu ho di'ak, ninia konpeténsia nu'udar karpinteiru presiza servisu ho hakmatek hanesan ita refleto ona katak servisu ho pasiénsia. Nia harohan hari relasaun di'ak ho Maromak. Tan ne'e rekoñese katak nia la'os de'it karpinteiru ida, Jezús nia aman, Maria nia kaben. José mak harohan nain ida no iha fiar ne'ebé maka'as iha Maromak.

Empeñu: Oinsá ha'u tau hamutuk dimensaun rua ne'e iha ha'u nia moris loroloron? Kontemplasaun no servisu. Hatene kontempla Maromak iha ha'u nia servisu loroloron?

Intensaun: Ita reza ba ita nia superiora sira.

Loron dasiak 18/03: Aten brani no mane di'ak.

Iha sosiedade iha ne'ebé mane sira barak iha hahalok violensia hasoru sira nia feen no oan sira, liu-liu tauk atu hasoru difikuldade. S. José sai modelu ba sira hotu. Nia la'o kilométru barak, hetan nia-an iha balada han fatin iha Jezús nia moris. Hadeer halo viajem naruk ba Egiptu atu proteje Menino Jezús, hasoru difikuldade oioin ho aten-brani no buka atu hetan solusaun ne'ebé di'ak. S. José mak ema di'ak liu. Tansá Maromak hili nia? Iha Judeu iha mane barak liu iha tempu ne'ebá maibé Maromak hakarak hili nia. Resposta simples, Maromak hatene katak S. José sei realiza kedas buat naran de'it ne'ebé Maromak sei husu ba nia, maski sei enfrenta difikuldade oioin. Nia la abandona ba oin nafatin.

Empeñu: Ita haka'as an atu sai fermentu Evanjellu nian iha sosiedade, lori karidade no barani kontra hahalok laloos.

Intensaun: Ita reza ba ema maksalak sira no ema moras sira ne'ebé lakon esperansa.